

ARGUMENTUM.

Qui noctu & interdium alterius fructus ex agro aufert, & alium in locum traducit, nec non magno dominum rei afficit damno, illud factum non aliter, quam alia furtiva, modo supra exposito, puniri debet. Si vero per diurnum furtum ablatorum esculentorum non magnum damnum datum fuerit domino, tum fur iste puniendus est civiliter secundum qualitatem personae & delicti, nec non consuetudinem loci.

EXEGESIS.

Imperator in concipiendo hoc articulo procul dubio respexit ad l. 77. ff. de V. S. ubi accuratè distinguntur fruges & fructus. *Frugum* nomine omnis reditus intelligitur, scilicet non solum, qui è frumentis & leguminibus, verum etiam qui ex vinetis, lapidicinis, ex sylvis cæduis capitur. *Fructuum* verò nomine dicuntur illa reliqua, quæ frugum appellatione non veniunt. per l. 45. ff. de Usur. Et licet hîc sese exferat controversia de vocabulorum significatione, sicuti eam instituit Salmasius, ut & Albericus Gentilis, quemadmodum id videre licet apud Tabor. p. 552. & 553. *Racemat.* tamen illa disputatio parum utilitatis afferre hic poterit.

(2) Illud interim certum est, quod Imperator hoc articulo cavere voluerit, ne alii herbas odoriferas, & quæ sub his continentur, herbæ medicinales auferrent. Vide Carpz. *part. 2. qu. 82. n. 27. 28. f. 274. Pr. Crim.* Omnia enim istæ generali vocabulo *frugum & fructuum* voluit complecti.

(3) Ut singula excutiantur ordine, notanda est tum forma, tum coërcitio seu pœna istius furti. *Formam* istius furti quod attinet, distingvere oportet, utrum noctu vel interdium tale furtum committatur? Et quidem (a) Quod ad furtum nocturnum attinet, tum sive ex agris, sive ex hortis, sive ex horreis, sive in urbe, sive extra eam fructus furto abducuntur, illud verum furtum habetur. Nocturna siquidem